

von Wulf Wager

Jetzt grillat se wiedr...



I sag's glei vornaweg: Grilla dua i ihrhaupt net gern. Des isch mir viel z'viel Gschäft ond Sauerei, bis dr Grill wieder sauber ond aufgräumt isch. I han a Küche, dort ka mr kocha, ond d' Terrass isch heggshdens zom Essa ond zum Gruaba do! Fertig. Bier trenka ka i au ohne zom Grilla.

Aber do geit's jo welche, die spenat total, wenn's oms Grilla goht. Dia fñhrat sich auf, wia wenn se dia Sau selber mit Pfeil ond Boga gschossa hättat. Do hend se Weber-Grill für 800,- Eurna ond

meh, ond grilla dent se a 80 Cent-Schweinehälsle vom Aldi. Ha goht's no? Do kenntat dia sich doch wenigstents a gscheit's Floisch voma reachta Metzger em Flecka oder voma Bio-Baura leischta, oder net? Noi, lieber kaufat die Grillspezialischta neuseeländisches Lamm oder argentinisches Rind - wia wenn mir dohanna koine Schoof ond Rendviecher hättat. Do kennt i mi uffrega.

Genauso, wia 's grad beim Wirtshaus zom Goldene M, beim Schachtelwirt, „Produkte“ für einen Euro geit. En Börger für 1 Euro. Ha, was soll denn do no an Lebensmittel dren sei? Weckle, Salat, „Floischkiachle“, Soß, Zubereitung, Steuer - für 1 Euro?? Des ka et xond sei.

Leut, guggat meh uf des, wan'r essat. I zom Beispiel kauf gern Bio-Artikel ei - au wenn's a bissle meh koschtet. Aber neulich, do hot me mei Weib ghoiða Zucchini mitbrennga. Jetzt stand i em Lada ond han d' Wahl zwischa offene normale Zucchini, oder Bio-Zucchini, dia aber dopplet en Folie eipackt waret. Ha wa isch 'n do no Bio? Wia hot mein Ähne äwwl gsait: „Ois isch gwieß, a Acker isch koi Wies!“

Manche moinat scho, se kenntat aos fir bleed vrkaufa.

Bis näggschd Woch'
Ihr

Wulf Wager

Alle Kolumna zom nochlesa ondr: www.woascht.de